

54-55

54-55
5+3



續文獻通考卷之五十四

選舉考 考課下

朝覲考察

皇明

國初外官每年一朝 洪武二十九年始定三年一朝之制以辰戌丑未年爲期 朝正後本部會同都察院考察奏請定奪其存留者俱引至 御前刑部及科道官各露章糾劾怠職之罪一時譴責宥免皆出 上命及宥免還任各 賜勅一道以申戒飭云

凡在外官員三年徧行 朝覲其各布政司按察司鹽運
司府州縣及土官衙門流官等衙門官一員帶首領官
吏各一員各理問所官一員照依到任須知依式對款
攢造文冊及將原領 勅諭諸司職掌內事蹟文簿具
本親齎奏繳以憑考覆各衙門先儘正官正官到任日
淺佐貳官到任日久必先佐貳官來朝若係裁革未及
二十里長州縣止設正官首領官各一員去處只令首
領官吏來朝其程途遠近各量里路比照行人馳驛日
期起程本衙門速將起程月日申部遠者不許過期近

者不許預先離職俱限當年十二月二十五日到京其
來朝官員服色各照品級花樣及 欽依今定樣製務
要新鮮潔淨俱各自備脚力不許馳驛及指此爲由科
擾於民

大明令凡各處府州縣有司官員在任三年不許注代許
令親將三載任內行過事蹟赴京 朝覲如無規避依
舊復任其佐貳官首領官一體三載來朝如一時勾當
輪換前來 國朝定例凡天下諸司官每三年一入
覲除市舶提舉司外浙江等布按順天應天所屬及直

隸各府州縣鹽運行太僕苑馬鹽庫提舉司官各帶首
領官吏一各布政使理問一上林苑監各署及各土官
官吏各一茶馬司吏一若裁減處首領官帶吏一名照
原降到任須知文冊親齎奏繳官儘正官如正官任未
及三月方以次代各離任後雖有陞調別故亦須赴京
畢事不許改委其遠近照水程日期不許預離曠職先
將官吏姓名并起程日期申部限九月以裏到部其各
該官吏俱限十二月十五日至二十五日以裏到京違
限者陸續叅奏服色品級花樣照 欽定製務須新潔

脚力盤費聽撫按酌量不許私自馳驛及科擾

太祖洪武元年正月天下官來朝 六年春正月癸卯朔

守令來朝 上命 賜酒饌明日辭復 諭之曰慈祥

愷悌身之德也刻薄殘酷德之賊也君子成其德故惠

及於人小人養其賊故殃流於衆朕舉廉興孝崇德勸

善惟欲移風易俗若僞爲慈祥必無仁愛之實僞爲愷

悌必無樂易之誠爾等宜勉修厥德廣施惠政以副朕

懷 八年春正月辛酉朔各省郡縣入朝 上以濟寧

知府方克勤有善政 錫燕儀曹 八年春正月癸亥

朔吏部言天下布按二司及府州縣 朝覲官凡四千
一百一十七人考其政績 詔稱職者陞平常者復其
職不稱職者降貪污者送法司罪之鬪茸者免爲民
六月 上諭吏部曰天下府州縣官一歲一朝未免曠
官滋費自今定爲三年一朝齋其紀功圖冊赴部考覈
布按二司官亦然著爲令 是年八月 命吏部都察
院考察在外方面及郡縣官之昏懦不才者罷黜之
凡在外大小衙門官員考察洪武六年令監察御史及
按察司舉有過犯具奏黜陟

建文帝建文二年春正月丙寅朔天下官來朝免賀

成祖永樂五年十二月廣東布政徐奇入 覲載嶺南藤

篋將以饋 廷臣邏者獲其單目以進 上視之無楊

士奇名乃獨召問故士奇曰奇自都給事中受 命赴

廣時衆皆作詩文贈之故有此餽臣時有病無所贈不

然亦不免今衆名雖具受否未可知且物甚微當亦無

他 上意解即以單目付中官令毀之一無所問 十

一年夏四月 上謂呂震曰朕嘗命布按二司及府州

縣官至京者陳民間利病近有以時和歲豐民安物阜

續文獻通考 卷之五十四
為言者及驗視之田野荒蕪人民饑寒水旱蟲蝗皆不以聞朕已寘諸法今後所言有切民情治理者宜旌賞之否則重懲勿貸

宣宗宣德五年正月初天下朝覲官至京上命行在吏部廉察其賢否又令方面官各具所屬官貪虐及不稱職者上名吏部至是吏部奏貪污者二十五人當充邊軍老疾及鄙猥無能者五十五人當北京為民上曰老疾者鄙猥無能者皆罷歸為民貪污者民之害宜發戍邊是年令廉察朝覲官員貪污者發邊衛充軍

老疾鄙猥者為民其考滿月日已過者回任後將行過事跡造冊送合干上司依例考覈差人奏繳

英宗正統九年令廣西臨邊縣分係裁減衙門免其朝覲須知文冊府州縣類進十年令朝覲官員廉能

著稱治行超卓賞衣服一襲鈔一百錠仍賜宴于禮部十年春正月宴天下來朝賢能官布政丁鑑等于禮部先是刑科給事中鮑輝言天下各官來朝乞勅吏禮二部詢訪有廉能著稱治行超卓者禮部官引赴御前面獎勸賞吏部具錄其名待其考滿舉薦擢

用 上從之至是會舉司府州縣官丁鎡等 賜以
勅諭宴於禮部是年給事中鮑輝題洪武十八年以來
府縣正官佐貳官超出郡職者十有三員悉加遣官勞
以尊酒永樂七年汶上縣知縣史誠賦役均平撫民有
方翰林院寫 勅書陞濟寧知州仍掌縣事禮部差人
將酒一尊鈔一千貫織金紗衣一套賞之今來朝運使
等官丁鎡等十員係會官訪察廉能治行比衆爲優宜
加獎勸賞勞奉 旨已與 勅諭每人賞衣一套鈔一
百錠禮部與宴吏部記待陞用 十四年令考察存留

官員內有才行兼優政績顯著及守己廉潔人無間言
者行各撫按官買辦采幣羊酒齋獎仍不次擢用

英宗天順四年令 朝覲官賢能卓異者 賜宴及衣如

例 是年令 朝覲官員才行超卓政績顯著者 賜

宴禮部仍賞衣服一襲鈔一千貫老疾者致仕罷軟無
爲者冠帶間住貪酷并在逃者爲民才力不及者斟酌
對品改調 是年春正月天下諸司官吏 朝覲至京

上召李賢謂曰 朝覲之弊不可不革賢曰誠如

聖慮即出榜示約不許與京官交通餽送土物亦不許

下人挾讐告害由是肅然不犯 上曰黜陟之典亦當
舉行賢曰此 祖宗舊制時吏部都察院退其不職者
數百人旌其才行超卓政績顯著者布政以下賈銓等
十人 賜以衣服楮幣禮部筵宴 命太監牛玉及李
賢王翽待宴隨於其中召布政蕭暄爲禮部尚書賈銓
爲副都御史

按是年布政官賈銓等十員弘治十五年布政等官周
孟中等六員正德九年布政等官陳恪等一十六員俱
行撫按獎勵

憲宗成化五年奏准雲南長官司免來朝州縣裁減去處
止該吏一名齋文隨司府州縣官員進繳其各府首領
官遇邊務差占亦免來朝 六年九月吏部言通者兩
奉 詔旨以人才難得恐考察黜退官中尚有一二可
用者 命臣等集議臣等詳審得廣西平樂知府袁裏
山東泰安知州畢宗賢河南修武知縣劉昭山東濟寧
州判官張寧歷城主簿郝志道俱在被黜之數舍短取
長尚有可用其餘一時難知不敢泛舉至於伸訴奏告
之人難以准理宜照舊發遣從之 十一年春正月吏

續文獻通考 卷之五十四
部奉罷 朝覲官布政使楊文琳按察使王琳等一千三十一員 十四年春正月吏部以 朝覲奏老疾罷軟貪酷及素行不謹官二千十六員 詔老疾者致仕罷軟不謹者冠帶閑住貪酷者爲民惟福建右布政鍾清浙江按察使劉鈺江西按察使趙啟清慎正直中外所聞爲權奸忌陷俱列不謹君子惜之鈺忠愍公球之仲子也學行爲尤著云 十六年十二月吏科給事中王瑞等言比湖廣江西等處巡撫等官各奏所部災傷民饑盜起請免各官明年 朝覲臣等以爲 朝廷

命官初意惟欲其安養生民撫綏地方今民饑盜起皆各官不職所致正當罪以示警顧乃爲之請留前後因仍恐爲定制諸司正官既留則進退人才無由而審止 憑巡按等官所報揭帖則考察之典亦應故事而已且地方多事自宜設法拯濟何至故違舊制使 朝覲大典漸至廢弛明年來朝并在任官乞嚴加考察或有不公者聽科道糾之庶足以爲徇情欺罔之戒 上曰三年述職 國家舊典若徇所司各庇其屬有貪暴荒怠者烏得而覈之給事中言是其令吏部知之 二十三

續文獻通考 卷之五十四
年正月吏部尚書李裕建言 朝覲考察天下官員乞
創立才力不及一例照品級調簡僻衙門用從之遂爲
定制

孝宗弘治元年令考察罷閒官吏在京潛住有擅出入
禁門交結者各門官盤詰拿送錦衣衛打一百發烟瘴
地面永遠充軍 六年令方面知府年老未考滿罷軟
無爲非本部訪有實跡或有巡撫巡按止是一處開報
并其餘官員到任未及二年非老疾貪酷顯著者俱留
辦事且令朝覲之年先期行文布按二司考合屬巡撫

巡按考方面年終具奏行各該衙門立案待來朝之日
詳審考察如有不公許其伸理其科道官必待吏部考
察後有失當方許指名糾劾 八年奏准各處巡撫巡
按會同考察布按二司并直隸府州縣各鹽運司行太
僕寺苑馬寺等官賢否如無巡撫巡按會同清軍或巡
鹽考察俱無巡按自行考察其布政使按察使及分巡
分守并知府知州知縣并司寺正官各訪所屬官員賢
否開具揭帖送巡撫巡按以憑稽查其巡撫官當 朝
覲之年仍具揭帖密報本部止據見任不謹名目不許

追論素行其開報官員若愛憎任情擬議不當本部都
察院并科道官指實劾奏罪坐所由若被黜官員有不
服考察據實妄奏者發遣爲民 十六年奏准陝西洮
河西寧茶馬司大使等官俱免 朝覲止令該吏齋冊
應朝 十七年五月 勅吏部都察院比年考察 朝
覲官員率多撫按官考語多不得實爾等詢訪亦欠周
詳以致賢否倒置明年正旦適當 朝覲之期宜預行
撫按官從公開報爾等備悉叅詳精白一心秉持公道
庶幾澤被生民上回天意其欽承之

武宗正德八年令各處被災被兵地方許撫按官預先勘
實具奏免其正官 朝覲若有科歛害民者仍許提問
劾奏 九年令 朝覲官各陳地方利害又區處方略
吏部行各該衙門勘酌會議奏請施行 十年令 朝
覲官員廉能著稱治行超卓者賞衣一襲鈔百錠仍
賜宴于禮部至十四年給事中趙漢奏不拘官職出身
不論來朝在任行各撫按支給官錢每官買辦綵段一
表裏羊一牽酒二樽遣人齋獎超擢以彰激勸奉 旨
考察過應留官員內有才行兼優政績顯著及守己廉

續文獻通考 卷之五十四
潔人無間言的依擬旌獎不次超用

世宗嘉靖二年題准方面知府正官考才力不及者照京官不及降調例不許止議調簡 六年令 朝覲考退官員果有執法被誣奪職許大臣言官即時論辯吏部查訪可否具奏定奪 八年令來朝官員各陳地方民情利弊興革事宜開送二司官取其可用者類送吏部都察院看議奏請 又令吏部將賢能官員分別等第奏聞優等官員查照舊例奏請宴賞給與 誥勅 十年 詔吏部將賢能官員分別等第開奏來聞優等官

員查照舊例奏請 賜宴賞賚給與 誥勅以寵異之但要簡拔精當則人心自服如此行之庶幾人人有所奮勵各修職業守令自重民生自安矣部院大臣其體朕此意推廣而行毋得徒應故事 十六年以考察全據考語未免失實令吏部都察院先事秉公查訪旌別黜陟 十二年題准 朝覲考察預行各該撫按官將三年內所屬大小官員不分陞調考滿丁憂起送緣事在逃等項凡係廉勤公謹及貪酷罷軟不謹老疾才力不及者各手注考語密封送部以憑考察務要賢否明

續文獻通考 卷之五十一
白去留可據如毀譽任情是非淆亂及枝詞蔓語自相
矛盾者聽本部都察院指實叅奏 二十四年奏准各
衙門黜退降調官員不許在京潛住造言生事擬拾妄
奏違者不分有無冠帶俱發口外爲民 二十五年令
部院嚴加查考如有貪酷實跡者不拘曾經撫按旌舉
俱要開奏罷黜

是年奏准考察後陞調事例凡應朝大小官員陞調外
任者不問已未領憑俱要到部聽候考察事畢改給憑
限赴任違者叅奏罷職 凡應朝不到官員係堪存留

人數患病者查實着令復任丁憂者查明准令守制其
不係患病丁憂者以逃論 又題准方面等官應朝逃
回者行各撫按備查因何事故如有贓私實跡嚴行本
處官司提問追贓照依律例從重問擬

穆宗隆慶元年八月以虜患免山西大同太原二府并各
屬應蔚渾翔保德岢嵐忻代八州大同懷仁山陰馬邑
靈丘廣昌靈河曲興嵐繁峙五臺靜樂臨崞定襄寧鄉
十七縣及行太僕寺正官來朝 以水災免湖廣荊漢
二府及江陵公安石首監利均州襄陽棗陽南漳宜城

穀城商州洋縣各正官來朝 南直隸浙江撫按官各
以地方災寇奏免淮揚二府及杭寧溫台四府正官來
朝吏科王治言 朝覲大典六府官不宜援有事例乞
免 上命仍來朝如制 十二月 諭吏部 朝覲官
來京 祖宗時不許各處營求於是尚書楊博等都御
史王廷等給事中王治等各上疏請嚴行申飭內外官
有私相問餽五城御史以聞從之 二年正月陝西副
使姜子羔言入 覲官各有道里費及餽遺私齎宜令
進獻羨餘以佐 國計布政司官銀三百兩按察司官

二百苑馬行太僕二寺官一百運司及府正官二百五
十佐貳官一百州縣正官二百佐貳官五十首領及邊
遠者量進疏入 上曰進獻非事理 朝廷亦不藉此
足用不許第以諸司路費皆取諸民令御史查照原給
銀數追收貯庫自後進表 朝覲官更不得派給累民
四年題准考察官員不分方面有司若才力不勝繁
劇尤堪以原職調用者擬調簡僻地方若原非煩劇不
堪以原職調用者擬調閒散衙門其跡涉瑕疵尚未大
著者擬降級或才力不宜有司文學尤堪造士者擬改

教若先經調簡再考不及者即擬罷軟仍咨行各撫按
官以後論劾不及官員悉照前款明白考注以憑議覆
不許只爲含糊降調之說 是年給事中光懋等題准
兩廣見在用兵要查某處事勢危急及各省地方果有
災傷賊情事勢重大正官必不可缺者量留數員料理
其一切零賊小災及兩廣不用兵郡縣俱要責令依期
入覲奉 旨依擬 本年御史王嘉賓等奏覆考察多
寡之間不當容心雖一方果有不肖固不必較數省之
中以爲常亦不當視往歲之數以求加如有過跡可疑

蒞任極淺者尤當容令改圖至於科道拾遺舊止及於
方面而知縣以下不與焉今次仍當照例申明不許槩
及有司以免風聞之誤奉 旨依行 是年題准已經
考察閒住復朦朧在任官員行巡按巡撫擒拿問罪冒
支俸糧追去還官 是年十月 聖諭非時考察科道
凡故相徐階門生故吏鄉里親友及助階攻高拱者削
籍謫外有差考察之日趙貞吉惡其不公大詬于部堂
五年議覆卓異貪汙之尤者各疏名上 請賞則悉
照舊典公之 朝堂量行宴 賜以昭其寵罰則除

誥勅已追仍發撫按嚴行追贓以盡其辜不係來朝及
聞報逃回者轉行各撫按官一體獎賞追問奉 旨依
行 又該都給事中韓楫御史孫丕揚等條陳貪酷之
罰着實舉行有按察使等官楊綵等一十五員俱廉能
卓異知府等官徐必進等二十一員俱貪肆之甚通判
等官畢效欽等四員俱酷烈之甚奉 旨楊綵等既賢
能卓異依擬宴賞徐必進等貪酷異常都着革了職爲
民仍行各該巡按御史提問具奏 是年二月 勅諭
天下 朝覲官曰朕繼承大業五年於茲夙夜兢兢惟

敬天勤民是務顧四方萬國豈朕一人所能徧察所冀
承流宣化又安元元實賴爾藩臬郡縣諸臣與朕分理
共圖至治茲當大計群吏之期既令所司審復簡汰其
貪虐異常者仍盡法重按之政績卓異者特 賜宴賚
用彰彞典令爾等各還舊任尚益加省勵恪守乃職守
法奉公約已惠下俾生民樂遂德澤旁流庶副朕養賢
求治之意如或殃民自殖急棄官常憲典具存朕不爾
貸爾等其勉之戒之欽哉

今上萬曆元年正月奉 旨朝覲考察係重典朕臨御之

初方精覈吏治圖寧邦本便行與各該撫按官將所屬
官員賢否務要虛心秉公定注考語部裏還細加詢訪
有徇私報復模糊抄寫是非失實的即便叅來處治來
朝正官說事支漫附和的以罷軟論 是年題准今後
考察凡方面已陞京堂者止聽兩京科道官論劾各撫
按官不得一槩叅論 二年令吏部都察院將來朝官
員有廉能超衆者查實具奏引至 御前面加獎賞仍
賜宴于禮部其貪酷異常者着錦衣衛拏送法司問
罪不應朝者着各該巡按御史提問 本年正月 聖

諭朕御極之初深思治理惟以察吏治安民生爲要務
茲 朝覲考察方面有司官其中有貪虐害人及廉能
超衆實心愛民的着吏部都察院不拘出身資格官職
大小從公分別賢否查其實跡并保薦論劾之人另本
開坐有布政等官謝鵬舉等二十五員奉 旨這廉能
官着吏部都察院堂上官并史科都給事中掌河南道
御史引來會極門朕面加獎賞知府等官賈淇等一十
八員俱貪酷奉 旨這貪酷害民官都革了職爲民見
在應朝的錦衣衛拏送法司問其餘的各該巡按御史

提問具奏隨該錦衣衛拏究具奏 內閣張居正等題
請 欽定行禮日期奉 旨十八日行禮該部具儀來看
該吏部酌議上 請欽奉 明旨先行演習本日恭荷
皇上 御會極門將見在應朝廉能官謝鵬舉等
十員引至 御前 皇上親發 玉音你每都是好官
回去還要用心供職替朕愛養百姓在外的都傳與他
每知道又 命與他賞賜還與酒飯吃 五年令廉能
卓異者紀錄擢用貪酷異常者各巡按御史提問追贓
具奏 七年題准 朝覲官員回任違限一月之上問

罪三月之上送部別用半年之上罷職不叙 十年議
准先曾調用官員再考不及者查果才力綿弱即照罷
軟例閒住如以別事議調才力尚有可用仍照不及例
酌量改降 十三年議准致仕官員有志甘恬退爲親
告休者不得復入考察 又題准 朝覲事例凡官員
棄職回籍若情有可原事無規避曾經申請奏報稽遲
不得已而始去者撫按官過大計之時止坐以擅離之
罪另本論斥另文革職不必類入考察數內槩坐以逃
其新選新陞輒棄官不任者查無觀望規避重情止照

過違憑限事例革職間住亦不得槩以逃論 十七年
令天下諸司官吏來朝明年正旦各造事跡文冊仍畫
土地人民圖本俱以十二月二十五日至京其服色各
以品級爲差惟雲南遠在邊鄙特免其來 二十二年
都察院奏先年事例天下 朝覲官員入京本院預將
禁約事宜請 旨出榜禁約 一謂在京官吏軍匠各
色人等不許挾奸嚇騙投揭陷害外官 一謂 朝覲
官員不許交通京官營求打點即門生故屬不得私相
交際 一謂被論黜官員不許捏情奏辯及父兄弟

托故代辯或因而挾仇反噬 一謂入 覲留用官員
不許明肆餽遺陰擬賄賂在京官員亦不得先送下程
開設筵宴 一司府各官不許派令所屬供應及備送
鄉官禮儀 以上數端俱當嚴行申飭乃臣等又准往
年餽遺之禁能止其不以菲儀顯加於閒曹卑秩而不
能止其不以緡禮暗投於要地尊官是使人心愈壞而
吏習愈卑即敝風難遽以轉移而矯枉不嫌于過正合
無責成于吏部并本院及九卿堂上六科十三道等官
各嚴拒餽遺有暗投者即從直糾發則外官安肯甘心

餽遺自罹法網奉 旨俱依擬着實行 是年吏部尚書孫丕揚奏二十三年正月初一日例刻天下官員朝覲本部會同都察院一應禁約事宜議案呈出示曉諭遵守 一來 朝覲官到城外在京官不許私出相見入城之日不許乘夜潛謁巧托夤緣及私令家人往還透漏消息其私求囑托節奉 明禁但其勢要官員無故而爲人薦揚伸理者所薦之人雖素稱賢能其爲鑽刺可知定以不謹論黜 一投文見部之日布按二司及知府俱遵照屢奉 欽依將所屬各司道各府佐

州縣正官貪酷異常者無論撫按已劾未劾無論已經優薦具揭帖開其實跡密封到部惟各官所真知酌見毋得觀望撫按迴避勢要如各官隱匿本部別有訪聞則各官之不能察吏可知即以不及議處 一考察過堂來朝方面并運司各直隸府州縣官各將屬官賢否從實聲說如有冤枉許爲辯白如有倖留許爲糾舉若徇私庇護挾忿誣害及含糊兩可觀望雷同本官才力即此可見本部考察方面以此爲第一義毋自貽悔 一各官坐蓬節年各省官員俱于十二月二十六日坐

起至考察完日止該吏科條議要將坐蓬盡行裁革隨
該本部會同都察院覆奉 欽依量搭數間爲各官聽
考察過堂之所各省方面官員如遇聽考之日務要鈐
束屬官在寓安心靜坐其該考察之日照依派定次序
坐蓬以聽掣籤至晚候牌方散其日用之數俱從簡省
不許擡扛層架聚飲喧譁違者巡宿官吏掣獲稟究仍
當謹慎火燭本部行五城兵馬司各委官一員帶領火
甲不時巡視及把截閒雜人等不許擅進蓬舍私相交
通 一來朝官員或有假以開報賢否爲由嚇取僚屬

財物及索要土儀派令餽送者訪出以貪論所容有屬
賃房雇役并各項供給以不謹論其不遵嚴禁沿襲舊
套潛行餽送京官者聽五城及緝事衙門照屢次題奉
欽依緝拿重究或本部訪出特叅究治 一搭蓋蓬
廠近經條議裁減照例劄行順天府動支官銀各役工
食俱已究給其考察流水等冊俱係本部自造并行都
察院謄寫如有假稱匠役及造冊人役需索財物者許
來朝各官稟明本部拿究具見風力如聽信詭騙本部
訪出以不及議處 一本部文冊關防嚴密如有無賴

棍徒指稱本部弟姪子男家人各色及吏書火房冊庫
長班各役潛到各官稱說洗改劣考可圖倖免及抄送
優考需求賞犒許來朝官即時拿送本部叅送法司從
重論究本官才力可知另行優處雖已經論劾官員亦
得分別稍從末減若各官縱容聽其詐騙者事發一併
重究 一在京在外官吏軍民人等敢有詐冒緝事名
色挾要來朝官員財物并捏執詞狀向各官嚇騙者許
歇家同被害之人拿送本部轉送法司照例問遣 一
投遞私揭節奉 明禁近來各緝事衙門通不緝拿致

使匿名揭帖得黏布街衢甚有聽人指使捏詞奏告陷
害官員本部密差的當人役仍行五城及緝事衙門嚴
訪拿究仍聽諸人首告拿者照舊題准事例比捉獲強
盜條格陞賞原詞棄毀不行 一存留二司府州縣正
官事畢之日各具揭帖一通備開某地方有何賢人伏
在巖穴堪備起用有何才士抑在下僚當與振拔邊方
勛勳何人堪寄干城督撫重鉅何人堪授節鉞文學德
行誰可備督學之選循良卓異誰可應 璽書之徵上
自 廟堂之大計下至閭閻之細微何利當興何弊當

經義廣通
卷之五十四
三十一

草各舉所知備開報部每一樣二本以憑採擇施行各官經濟之畧具于此而可覘焉 一被黜官員即便辭朝回籍若潛住京師披拾妄辯者不分有無冠帶照例問發口外爲民其存留官員即依限赴任不許遲延曠職業如違例限聽各撫按叅奏處治奉 旨依擬行

軍官考察事例

今上萬曆二十二年三月兵部奏兵科都給事中張棟等條陳三事 一議軍政之限所當定大約爲各省直考選軍政前後具 奏參差不一乞要一如文臣考察事

例依期具疏照得考選軍政之期本部于前十月內先期題請通行各省直撫按所屬官員覆加考選依期具奏聽本部覆議上 請今據各該撫按軍政奏抄到部遲速不齊以致陸續題覆煩瑣非體相應依擬通行各省直撫按衙門凡遇五年考選軍政一如文臣考察之例無論地方煩簡路途遠近俱先時考定于該考年分十月內齎疏到京十一月初一日赴通政司類報具奏本部查明類覆如有稽延後期者聽本部并該科查叅及照各省直掌印僉書都司與衛所官俱一時考選

即當一疏具奏今查有同一疏者有各一疏者亦屬參差相應併議以後考選軍政將各都司分別優劣叙于衛官之前一併具奏不得又各具奏 又議考選之例所當重大約省直軍政奏冊參差違例者及謂賢否失真進退不一乞要定爲 典制照得考選例有奏冊清冊今查各省直有遺冊者有以青冊代奏冊送科者委非慎重之體應如科臣所議通行各省直撫按衙門凡軍門考選具奏之時以奏冊送科青冊送部以憑查核如仍前疎漏草率者聽該科查叅至各官賢否則巡撫

年終巡按復 命將所屬武官考語造冊送部本部黜陟則又專憑撫按舉劾與所造考語相同質對其五年考選在京衛者博訪巡視京營 皇城科道等官及驗軍主事各開造賢否併叅前後差御史平日之所薦論獎戒者以定去留俱無敢輕忽惟近時被薦者或擬韓白或擬孫吳直將並之鷹揚而盛名則難副也無幾又以劾去矣被劾者賊至數百賊至千餘殆不勝狼籍而究竟止革籍也無幾又以薦起矣是舉刺無所實據則用舍安得定衡如于應薦者止擬其二三實事而錄之

不必爲四六之套語若全材爲難或用其所長畧其所短不嫌並陳鼓舞之中寓砥礪之意於應劾者亦據其二三實事而刺之無盡據訪單之風聞若貪暴顯著或審實於被害或審實於佐証然後提問參問之後無轉轉之端查得參劾文職者節奉 聖旨前有 旨各撫按訪有所屬官員惡跡或被告訐即便嚴提干証面審果有實跡方行論劾近來各官通不遵行始則輕行論劾以著風力終則模糊問擬圖了前件以致公道不明罪有枉縱今後再有這等的着吏部都察院從公查處

叅治欽此叅劾武職亦當遵照比例其薦之也求實則被薦者勸不至於方進復退其劾之也求實則被劾者懲不至於方蹶復起矣 又議武官糾拾之例所當嚴大約爲邊腹將領及錦衣衛南北司官糾拾不及無以示懲照得武察與文察不同經文察者擯斥終身經武察者有薦復用文察則藩臬郡邑之長俱集於 京師採訪爲便武察則止據撫按之疏以爲去留此外耳目難寄體察難周且慮棄而復用必生玩易慎無輕棄以免數易故先年武察糾拾內止於五府錦衣衛堂上官

外止於邊腹總兵及副總兵有府衙應自陳者就其閱歷之最少者任之最重者而糾之若副叅遊守都司等官在京營每年有巡視科道糾劾在邊腹每年有督撫按臣糾劾而臨時又有備者察者故言官糾拾未議及此近來人心日玩武備日弛則澄汰之法宜益加嚴至於錦衣衛南北兩司不在自陳之例先年亦有糾拾之例今應酌議除僉書都司及守備把總備禦提調等官仍聽各撫按考察或不得論劾外則邊腹副叅遊擊掌印都司及錦衣衛南北兩司凡遇考選畢日悉聽言官勵而于軍政大有裨矣

王官考察事例

穆宗隆慶三年題准除良醫典樂引禮舍人原無陞補照舊不考外其護衛首領典簿典膳奉祠典寶典儀工正教授及郡王教授典膳等官務與長史審理紀善一體查覈有老疾不謹及玷缺年深者各該撫按官開奏五年題准長史有貪肆者不必候六年考察許不時叅

續文獻通考卷之五十四
劾以憑懲治

續文獻通考卷之五十四終

續文獻通考卷之五十五

學校考 太學

宋理宗紹定二年臣寮言國子監內外學校之官令於士子程課之外迪以義理之學勵以行誼之實從之又奏近年士習萎蕪乞申飭胄監師儒之官專意訓導使之痛習經傳考訂義理課試選論須合體格去浮華之弊轉移士風從之 端平二年詔榮文恭王府皇后宅置教授各一員皇后宅可依紹興舊典四姓小侯立五經師之遺意三省并行省叅酌以聞 淳祐六年詔曰朕

臨朝願治每念乏才有意作成既親書扁題分賜諸學
并賜諸生束帛以示激勵其令二三學官於前廊長輸
及齋生中公舉經明行修氣節之士別議旌賞京學如
之

度宗咸淳八年詔加太學餐錢寬科場恩例從賈似道之
請也

丘氏濬曰處士橫議必在國家未造當隆盛時無此事
也方漢盛時無有所謂浮議也而黨錮之興乃在桓靈
之世宋時忠厚立國不殺士大夫當時士大夫毅然以

氣節名義爲重一遇國家有事輒明目張膽別白言之
不少顧忌往往以此得美名躋顯位不幸觸諱遭遷謫
以去及其事久論定直聲勁節亦從此益大以著士大
夫習見其然其中不逞者遂借此以爲取名之階進身
之徑其流弊之極遂至學校所養之士亦效尤之至於
景定淳祐之間朝廷任一宰執用一臺諫稍不若衆心
三學之士相率攻之必去其人而後已賈似道入相度
其不可以力勝遂以術寵絡之於是加太學餐錢寬科
場恩例三學之士啖其利而感其恩目擊似道之誤國

經三虞通二
卷之五十五
一
噤不敢出一聲甚至要君去國亦上書贊美挽留之無所不至嗚呼三學諸生平日所以叩閣上書經臺投卷者無非仁義之言聖賢之道至是其心迹盡露矣嗚呼士大夫之在學校者尚知所以自守而毋蹈宋人之失哉或曰學校之士遇國家有事上下蒙蔽之時亦可以默與曰漢之王咸唐之何蕃宋之陳東當言而言專爲國而不爲私是固君子之所與也

宗學 寧宗嘉定七年秋七月復建宗學置博士教諭各一人弟子員百人在屬籍者三歲一試補弟子員如太

學法 九年以宗學隸宗正寺

理宗淳祐元年七月詔以宗學博士諸王宮大小學教授輪日詣榮邸講授

小學 理宗嘉熙元年詔建內小學擇宗子十歲以下資質美者二三人置師教之 淳祐二年詔建內小學置教授二員選宗室子俾就學 八月詔小學開講 七年正月詔皇姪孟啓特授宜州觀察使建資善堂于內小學置直講贊讀二員

遼

經文廣通考 卷之五十五
太祖時置上京國子監設祭酒司業監丞主簿 時南京
立太學

聖宗統和九年八月以南京太學生員寢廣特賜水磴莊
一區

道宗清寧五年設設學養士頒經及傳疏置博士助教各
一員 六年六月中京置國子監

金

海陵天德三年始置國子監定制詞賦經義生百人小學
生百人以宗室及外戚皇后大功以上親諸功臣及三

品以上官兄弟子孫年十五以上者入學不及十五則
取有物力家子弟年十三以上二十以下者充凡會課
三日作論策一道季月私試如漢生制

章宗太和元年九月更定贍學養士法國子生人給民佃
官田百八畝歲收以所入租官爲掌其數

算學 金制凡司天臺學生女直二十六人漢人五十人
聽官民家年十五以上三十以下試補又三年一次選
草澤人試補其試之制以宣明歷試推步及婚書地里
新書試合婚安葬并易筮法六壬課三命五星之術

醫學 金制凡醫學十科大興府學生三十人餘京府二十人散府節鎮十六人防禦州十八每月試疑難以所對優劣加懲勸三年一次試諸太醫雖不係學生亦聽試補小學 國子學及女直國子學內皆設之

元

太宗六年設國子總教及提學官以馮志常爲國子學總教命侍臣子弟十八人入學

按此元置學之始也夫以一蠻夷之主金革未定即思文教之興豈夫子所謂夷狄之有君與

世祖至元六年七月癸酉立國子學 七年命侍臣子弟

十有一人入學以長者四人從許衡以童子七人從王

恂二十四年立國子學而定其制設博士通掌學事分

教三齋生員講授經旨究正音訓上嚴教導之術下考

肄習之業復設助教同掌學事而專守一齋正錄申明

規矩督習課業凡讀書必先孝經小學論語孟子大學

中庸次及詩書禮記周禮春秋易博士助教親授句讀

音訓正錄伴讀以其次傳習之講說則依所讀之序正

錄伴讀亦以此而傳習之次日抽籤令諸生復說其功

課對屬詩章經解史評則博士出題生員具藁先呈助教俟博士既定始錄附課簿以憑考校許衡又著諸生入學雜儀及日用節目是年又命生員八十人入學俾永爲定式而遵行之八年命設國子學增置司業博士助教各一員選朝中百官近侍蒙古人子孫及俊秀者充生徒九月選胄子脫脫木兒等十人肄業國學十年劉秉忠等請增置生員從之

十三年不忽木與同舍生堅童太答禿魯等請廣學制疏畧曰堯舜禹湯文武之世莫不有學故其治隆於上俗美於下而爲後世所法降至漢朝亦建學校詔諸生課試補官魏武帝起自北方既定中原增置生員三千儒學以興此歷代皆有學校之証也臣等今復取平南之君建置學校者爲陛下陳之晉武帝嘗平吳矣始起國子學隋文帝嘗滅陳矣俾國子學不隸太常唐高祖嘗滅梁矣詔諸州縣及鄉並令置學及至太宗數幸國學增築學舍至千二百間國學太學四門學亦增生員其書算各置博士乃至高麗百濟新羅高昌吐蕃諸國酋長亦遣子弟入學國學之內至八千餘人高宗因之

遂令國子監領六學一曰國子學二曰太學三曰四門學四曰律學五曰書學六曰算學各置生徒有差皆承高祖之意也然晉之平吳得戶五十二萬而已隋之滅陳得郡縣五百而已唐之滅梁得戶六十餘萬而已乃其崇重學校已如此况我堂堂大國奄有江嶺之地計亡宋之戶不下千萬此陛下神功自古未有而非晉隋唐之所敢比也然學校之政尚未全舉臣竊惜之臣等向被聖恩俾習儒學欽惟聖恩豈不以諸色人仕宦者常多蒙古人仕宦者尚少而欲臣等曉識世務以任陛

下之使令乎然以學制未定朋從數少譬猶責嘉禾於數苗求良驥於數馬臣等恐其不易得也爲今之計如欲人材衆多通習漢法必如古昔徧立學校然後可若曰未暇宜且於大都弘闡國學擇蒙古人年十五以下十歲以上質美者百人百官子弟與凡民俊秀者百人俾廩給各有定制選德業允備足爲師表者充司業博士助教而教育之使其教必本於人倫明於物理爲之講解經傳授以修身齊家治國平天下之道其下復立數科如小學律書算之類每科設置教授各令以本業

訓導小學科則令誦讀經書教以應對進退事長之節
律科則專令通曉吏書書科則專令曉習字畫算科則
專令熟閑算數或一藝通然後改授或一日之間更次
爲之俾國子學官總領其事常加點勘務要俱通仍以
義理爲主有餘力者聽令學作文字日月歲時隨其利
鈍各責所就功課程其勤惰而賞罰之勤者則升之上
舍惰者則降之下舍待其改過則復升之暇日則聽令
學射自非暇日無故不令出學數年以後上舍生學業
有成就者乃聽學官保舉蒙古人若何品級諸色人若

何仕進其未成就者且令依舊習學俟其可以從政然
後歲聽學官舉其賢者能者使之依例入仕其中不可
教者三年聽令出學凡學政因革生員增減若得不時
奏聞則學無弊政而天下之材亦皆觀感而興起矣然
後續立郡縣之學求以化民成俗無不可者臣等愚幼
見於書聞於師者如此未敢必其可行伏望聖慈下臣
此章令諸老先生與左丞王贊善等商議條奏施行臣
等不勝至願帝覽之喜

翰林集賢學士程鉅夫奏曰臣聞國家天下必需才以

續文獻通考
卷之五十五
爲用而人才之盛非自盛也全在國家教育之勤其衰也反是叅之歷代可考也國家自中統建元以來中外臣寮亦時聞表表偉傑者皆自往時故老宿儒薰陶浸灌而然歷時既久以次淪謝邇來晨星寥寡無幾何矣臣不知更十餘年後人物當何如其瑣瑣也而主國論者恬不知怪視學校爲不急謂詩書爲無用不知人才盛衰張本於此蓋嘗有旨行貢舉求好秀才上意非不諄切而妄人輒陰沮之應故事而集議凡幾作輟矣然則無怪乎選任之非才政治之不理也今已至此後當

若何臣愚欲望陛下明詔有司重學校之事慎師儒之選京師首善之地尤當興建國學選一時名流爲國人矜式優以餼廩隆以禮貌四方觀感有所興起外而名都大邑教官有缺不但循常例取庸人而已必使廷臣推擇可以爲人表儀者條具奏聞令有祿可養而不墮職比親民而加優視教化之興廢爲考第之殿最其諸生有經明行修者特與蠲免賦役依此降詔旨施行庶國家教育有方多士鼓舞不倦他日隨取隨足無臨事乏才之嘆天下幸甚

續文獻通考卷之五十五
時各道儒司悉以曠官罷浙西道儒學提舉葉李召至
京師上奏曰臣欽覩先帝詔書當創業時軍務繁夥尚
招致士類今陛下混一區宇偃武修文可不作養人材
以弘治道各道儒學提舉及郡教授實風化所係不宜
罷請復立提舉司專令提調學官課諸生講明治道而
上其成材於太學以備錄用凡儒戶徭役乞一切蠲免
帝可其奏 二十四年設國子監立國學監官祭酒一
員司業二員監丞一員學官博士二員助教四員生員
百二十人蒙古漢人各半官給紙劄飲食仍隸集賢院

葉李爲尚書左丞一日從世祖至柳林奏曰善政不
可以徒行人才不可以驟進必訓以德義摩以詩書使
知古聖賢行事方略然後賢良輩出膏澤下流唐虞三
代咸有胥學漢唐明主數幸辟雍非爲觀美也乃薦周
砥等十人爲祭酒等官凡廟學規制條具以聞帝皆從
之

翰林國史院檢閱官袁桷上國學議曰成周國學之制
略見於大司樂其遺禮可法者見於文王世子三代而
上詳莫得而聞焉漢武表章六經興太學至後漢爲尤

盛唐制微附益之而其制愈加詳密今可考也宋朝承唐之舊而國學之制日隳至於紹興國學愈廢雖名三學而國學非真國子矣夫所謂三舍法者崇寧宣和之弊也至秦檜而復增之月書季考又甚於唐明經帖括之弊唐揚綰嘗曰進士誦當代之文而不通經史明經但記帖括或投牒自舉非虛席待賢之意宋之末造類不出此今科舉既廢而國學定制深有典學教胄子之意倘得如唐制五經各立博士俾之專治一經互爲問難以盡其義至於當世之要務則略如宋胡瑗立湖學

之法如禮樂刑政兵農漕運河渠等事亦朝夕講習庶足以見經濟之實往者朱熹議貢舉制亦欲以經說會粹如詩則鄭氏歐陽氏王氏呂氏書則孔氏蘇氏吳氏葉氏之類先儒用心實欲見之行事自宋末年尊朱熹之學唇腐舌斃止於四書之註故凡刑獄簿書金穀戶口靡密出入皆以爲俗吏而爭鄙棄清談危坐卒至國亡而莫可救近者江南學校教法止於四書髣髴諸生相師成風字義精熟靡有遺忘一有詰難則茫然不能以對又近于宋世之末尚甚者知其學之不能通也於

經文廣通考 卷之五十五 十一
是大言以益之議禮止於誠敬言樂止於中和其不涉
史者謂自漢而下皆霸道其不能詞章也謂之玩物喪
志又以昔之大臣見於行事者皆本於節用而愛人之
一語功業之成何所不可殊不知通達之深者必悉天
下之利害灌膏養根非終于六經之格言不可也又古
者教法春夏學干戈秋冬學羽籥若射御書數皆得謂
之學非若今所謂四書而止儒者博而寡要故世常以
儒詬誚由國家而化成於天下將見儒者之用不可勝
盡儒何能以病於世哉

二十五年十一月修國子監以居胄子 二十七年正
月勅從臣子弟入國子學

成宗元貞元年三月增置蒙古學正以各道肅政廉訪司
領之 大德八年二月增置國子生初增蒙古生百員
至是增置二百員選宿衛大臣子孫充之四月分教國
子生於上都 是年冬始定國子生蒙古色目漢人三
歲各貢一人 十年二月營國子學于文宣王廟西偏
定蒙古色目漢人生員二百人三年各貢二人

武宗至大元年五月御史臺臣言成宗朝建國子監迄今

未成請畢其功制可 二年十一月擇衛士子弟充國子學生 四年閏七月詔興學校上諭省臣曰國子學世祖深所注意如不忽木等皆蒙古人而教以成才朕今親定國子生額爲三百人仍增陪堂生二十人通一經以次補伴讀著爲令 是年復立國子學試貢法蒙古授官六品色目正七品漢人從七品試蒙古生之法宜從寬色目生宜稍加密漢人生則全用科場之制

仁宗皇慶元年二月徙大都路學所寘周宣王石鼓于國子監命中書平章李孟領國子監學諭之曰學校人材

所自出卿宜數詣國學課試諸生勉其德業 二年二

月命張珪綱領國子學六月以叅知政事許思敬綱領

國子學又命監察御史檢監察學官考其殿最旋建崇

文閣于國子監 延祐元年二月命叅知政事趙延世

綱領國子學以齊履謙爲國子司業 四月立回回國

子監 二年八月增置國子生百人陪堂生二十人歲

貢伴讀四員用集賢學士趙孟頫禮部尚書元明善等

所議國子學貢試之法更定之 一曰陞齋等第六齋

東西相向下兩齋左曰游藝右曰依仁凡誦書講說小

學屬對者隸焉中兩齋左曰據德右曰志道講說四書
課肄詩律者隸焉上兩齋左曰時習右曰日新講說易
詩書春秋科習明經義等程文者隸焉每齋員數不等
每季考其所習經書課業及不違規矩者以次遞陞

二曰私試規矩漢人驗日新時習兩齋蒙古色目驗志
道據德兩齋本學實歷坐齋二週歲以上未嘗過犯者
許令充試限實歷坐齋三歲以上許充貢舉漢人私試
孟月試經疑一道仲月試經義一道季月試策問表章
詔誥内科一道辭理俱優爲上等準一分理優詞平者

爲中等準半分每歲終通計其年積分至八分以上者
陞充高等生員以四十名爲額內蒙古色目各十名漢
人二十名歲終試貢員不必備惟取實才有試同闕少
者以坐齋月日先後多少爲定 三曰黜罰科條應私
試積分生員其有不事課業及一切違戾規矩者初罰
一分再犯罰二分三犯除名應已補高等生員其有違
戾規矩者初犯殿試一年再犯除名從學正錄糾舉之
正錄知見而不糾舉者亦從本監議罰之應在學生員
歲終實歷坐齋不滿半歲者並行除名除月假外其餘

告假並不准算學正錄歲終通行考校應在學生員除蒙古色目別議外其餘漢人生員三年不能通一經及不肯勤學者勒令出學其餘責罰並依舊規

集賢修撰虞集上學校議畧曰師道立則善人多今天下教官猥以資格注授強加之諸生之上而名之曰師有司生徒皆莫之信如此而望師道之立可乎爲今之計莫若使守令自求經明行修之士身師尊之以求其德化之及庶乎有所觀感也其次則操履近正確守經義師說爲衆所服者又其次則取鄉貢至京師罷歸者

其議論文藝猶足以動人非若泛泛莫知根柢者及爲考官謂同列曰聖經深遠非一人之見可盡不必先有主意若先有主意則求賢之心狹而差自此始矣同列服其言故所取多得人焉

英宗初罷回回國子監 至治元年五月命世家子弟成童者入國學 三月四月命張珪及右司員外郎王士熙勉勵國子監學

泰定帝三年更積分而爲貢舉並依世祖舊制其貢試之法從監學所擬大槩與前法略同而防閑少加嚴密焉

續文獻通考 卷之五十五 十一
侍儀舍人舊例舉積分生員充之後以積分既革於上齋舉年三十以上學行堪範後學者爲止錄通曉音律學業優贍者爲司樂幹局通敏者爲典籍管勾其侍儀舍人於上中齋舉禮儀習熟音吐洪暢曾掌春秋釋奠每月告朔明贊衆與其能者充之 四年九月勅國子監仍舊制歲貢生員業成者六人

文宗天歷二年勅增伴讀員數初二十人歲貢二人後於大德七年定四十人歲貢六人至大四年定四十人歲貢四人延祐二年歲貢八人爲淹滯旣額設四十名宜

貢四人延祐二年歲貢八人爲淹滯旣額設四十名宜充路令史者四人路教授者四人是後又命所貢生員每大比選士與天下士同試於禮部策於殿廷又增置備榜而加選擇焉 十一月命中書左丞趙世延提調國子監學 至順元年十一月以國子生積分及等者省臺集賢院奎章閣官同考試中式者以等第試官不中者復入學肄業 二年六月監察御史韓元善言歷代國家皆盛獨本朝國學生僅四百員又復分辨蒙古色目漢人之額請凡蒙古色目漢人不限員數皆得入

學不報

順帝元統二年三月詔科舉取士國子監積分膳學錢糧
儒人免役悉依累朝舊制學校官選有德行學問之人
以充 至元六年十二月國子監積分生員三年一次
依科舉例入會試中者取一十八名時復科舉制故也
後又詔國子生會試不中者同終場下第舉人例授
山長學正 十五年六月中書叅知政事實理門言舊
立蒙古國子監專教四怯薛并各愛馬官員子弟今宜
諭之依先例入學俾嚴爲訓誨從之

書學 世祖至元九年七月和禮霍孫奏蒙古字已設國

子學而漢官子弟未有學者及官府文移猶有畏吾字
詔自今詔令並以蒙古字行仍遣百官子弟入學 二
十六年尚書省言亦思替非文字宜施于用今翰林院
益福的哈魯丁能通其字乞授以學士九公卿子弟與
俊民依漢人入學肄習爲便遂置回回國子學

文宗至順元年九月詔舉蒙古字學

算學 世祖至元八年六月今蒙古官子弟好學者兼習

算學

皇明

國初都金陵以元集慶路儒學爲國子學 洪武三年設中都國子學 十四年改建國學于鷄鳴山之陽明年春作先師孔子廟改國子學爲監 二十六年革中都國子監

國朝歲報監生冊即周人學士之版也每歲終總一歲諸生之數分舉貢官例舊管新收開除實在之目具冊以獻於 天府蓋人材興替於是驗焉 祖宗時未有入貨之例而在監者輒將萬人今開例極廣而班生落落歲終出入不滿千人是不求其故耶

太祖洪武己未遣國子生王文罔等一百三十四人歸省仍各賜其父母帛名四疋先是 上諭中書省臣曰諸生入學之日久矣令歸省其親 賜其父母帛各四疋有妻孥者携以來月與粟錢務得其歡此勿惜有司費於是罔等皆告歸有司如 詔賚之 三年 詔設科取士自是國子生得就京闈鄉試 十七年三月命禮部頒行科舉成式凡三年大比子午卯酉年鄉試辰戌丑未年會試祭酒司業擇國子生之性資敦厚文

行可稱者應之 十八年會試國子生多在前列會元黃子

澄一甲丁顯練子寧俱監生 上大喜 二十一年三月殿試 上

以監生任亨泰 廷對第一 召祭酒宋訥褒諭之

命撰進士題名記立碑于監門 二十四年三月以監

生許觀會試 殿試皆第一 召國子監官褒獎之按

皇祖設科舉士既許國子生就試而國子生或得舉

者多或在高等則又以爲喜豈私於國子哉蓋亦敦崇

教始開勵學途其汲汲者如是也二百年來六館青衿

仰承休德爭自淬磨每禮闈啓試入對 大廷國子生

居天下人士十之六七且輒衰然爲舉首焉然後知

聖人之神化流洽於無窮也

成祖永樂二年始以北平府學爲北京國子監今太學是

也里曰崇教坊在都城東北隅即元國學遺趾

仁宗洪熙元年北京諸司皆稱行在永樂六年定都于北

京革行在止稱國子監八年重建左廟右學南雍六堂

居大堂之後茲則分列于前諸弘規審畫一視 皇祖

之舊

英宗正統九年三月初一日大學士李賢請修建國學

續文獻通考 卷之五十五
孝宗弘治十四年春掌祭酒事禮部右侍郎謝鐸以廟前
規度弗稱及諸學舍傾圮題奉 欽依修葺是後節年
修理未能歷記

世宗嘉靖十一年祭酒林文俊題修櫺星門前屏牆及內
外牆倒塌者時以 大駕將臨廟學盡加煥飾近歲工
部題准凡各衙門修理工計百金以上各衙門具 奏
行部覆修百金以下移部估修廟學各舍宇墻垣以歲
久多圯近或行工部量修或本監節膳夫銀自修然皆
小補缺敝而已其傾沒已甚者尚不無待於奏請也

按四代之學虞商貴在郊夏周貴在國在國以敦禮樂
教化之原在郊以遠朝禘市紛之劇 高皇帝卜太學
于南都之鷄鳴山去朝市且十里今太學雖沿元址其
去朝市亦如之不越都闈而夏隔囂會 列聖所取蓋
有深意

北雍規制

成祖初改北平郡學爲國子監正堂七間曰彝倫堂中一
間 列聖幸學俱設座於此上懸 勅諭五通東一間
祭酒公座面南司業座面西堂前爲露臺臺南中爲甬

路前至太學間長四十三丈 聖駕臨幸由之東西爲
墀諸生列班於此後堂三間東講堂三間西講堂三間
藥房三間折而東爲繩愆廳三間鼓房一間率性堂誠
心堂崇志堂各十一間博士廳三間鐘房一間修道堂
正義堂廣業堂悉如率性堂六堂乃諸生肄業之所東
折而南爲廊房九間門一間西亦如之太學門三間門
東 勅諭碑一通洪武十五年申明學制一通洪武三
年定學規碑一通洪武初年 欽定永樂三年申明學
規碑一通洪武十六年并三十年 欽定廟學圖碑一

通廟學規制地界四至丈尺盡勒焉正統十二年十一
月初四日立外西東井亭一又東爲持敬門以入廟自
中少北爲儲門以通啓聖祠土地祠及典簿典籍掌饌
廳倉庫之路祭酒東廂亦由此入西井亭一又西爲退
省號門自西少北爲廣居門以爲司業入廂及諸生入
號之路墀內雜植槐柏共二十一株前爲集賢門三間
門前爲通衢東西牌坊各一題曰國子監盡衢東西牌
坊各一題曰成賢街藝倫堂後齋明所九間格致誠正
號每號計三十七間嘉靖七年作敬一亭 御製 聖

諭共碑七座前爲大門題曰敬一之門祭酒廂房在亭東司業廂房在亭西會饌堂一所在監東北土地祠五間在饌堂門之右典籍廳五間在饌堂門之左典簿廳三間掌饌廳五間退省號及廣居門之西爲天地人智仁勇文行忠信規矩準繩紀綱法度凡一十八號并退省房三連混堂淨房各一所

四夷遣子入學事例

國初高麗遣金濤等四人來入太學洪武四年濤登進士授官縣丞不就乃與三人者同遣歸國明年西夏平

其國來賀復請遣子弟來學上以其涉海之難令與群下熟議而來二十一年雲南囉囉土官遣其二子入監讀書二十二年西南諸夷建昌烏撒烏蒙芒部各土官皆遣子入監日本國奏遣其官生來學二十五年秋琉球國遣其子及陪臣之子日孜每等至上命工部給羅絹爲秋衣給鋪蓋從人亦給衣馬冬琉球中山王遣其舅仁悅慈等至是時雲南四川等處土官時遣子弟民生入監者甚衆給賜亦每與外夷同監前別造房百間居之永樂二年琉球中山王從子

三五良賈等九人以謝 恩至京奏請入監 給賜一
如洪武中故事令工部建王子書房於監前以處焉
雲南土官生張文禮等入監者二十八人 四川天全
六番招討使高敬謙來朝亦遣其子虎入監是後滇蜀
土夷官民生入監多或至六七十人 三年琉球山南
王遣寨官子李傑至 四年中山王遣寨官子石達魯
等六人至其後李傑石達魯等在監三年得乞歸省
九年中山王遣王相之子懷得寨官子祖魯古至十一
年遣寨官子周魯等三人至是年有奏歸省者 上命

禮部厚 賜以榮其歸是後乞歸省或令候其使臣還
國以行永樂以後至于正德嘗三四遣至焉 嘉靖五

年中山王遣官生蔡廷美等四人至十一年歸國 十

七年遣梁炫等四人至二十三年歸國隨又遣蔡朝用

等五人至今在南雍處以光哲堂歲時給衣物如例

向慕文教琉球於諸夷爲最篤 國家待之亦爲最優

令其授姓命名一如中夏非復初遣之比我 明人文

之化於是益可徵矣太學前有交趾號舍蓋 成祖設

北監以來所以處交趾官生者乃知當時各夷遣子入

學之盛而今文案陳逸不可具考

勲戚入學事例

太學初設大本堂即命功臣子弟徐允恭等入從東
宮親王講讀尋又令公侯伯初承襲年幼者鄭國公
常茂蘄春侯康鐸等入大本堂讀書洪武五年今年
幼公侯伯及武官子弟初承襲者皆入國子學肄業是
時武官子弟自常氏而下蓋二百餘人十六年上
慮武臣子弟頑梗繩愆廳不能朴罰命曹國公李文
忠兼領監事以蒞之十八年又諭武臣從朕定天

下以功世祿其子弟長於富貴又以父兄早歿鮮知問
學宜令讀書知古今識道理俟有成立然後命官庶
幾得其實用也昔霍光功非不高身死未久而子孫橫
肆卒致夷滅者不學故也郭子儀中興唐室功蓋天下
位極人臣而心常謙退保全令名而福及後嗣者識道
理也今武臣子弟但知習武事特患在不學耳永樂
十六年以永康侯徐安建平伯高福安鄉伯張永年少
未諳禮度命入監讀書景泰天順以來勲戚如汝
陽大長公主孫謝琰平江侯陳豫之弟祐南漳郡主子

周境穀城郡主子魯琬皆乞 恩入監寧國大長公主
曾孫梅俊懷慶大長公主曾孫王隆則由 特命焉
成化十年令公侯伯駙馬初襲授者送監讀書習禮祭
酒一依學規教之不率者奏聞是歲入監者保定侯梁
傳等凡十四人 上累遣太監黃賜諭祭酒周洪謨嚴
加訓誨毋令惰學十一年 命西寧侯宋愷寧晉伯劉
福入監又令公侯伯襲爵并駙馬年二十五以下者俱
送監讀書崇信伯費淮曠不習讀本監叅題奉 旨住
俸祿一半革冠帶用衣巾讀書習禮 十二年以儀賓

王憲禮貌粗率發監讀書 十九年大名大長公主曾

孫李楨奏乞 恩入監 弘治三年八月刑科給事中

胡金建言儲養將材嚴著程式文事武藝相半講習行

移兩京五府各將侯伯都督凡新襲未任事者子孫應

該襲廕者通行送營以習武藝送監以習文事在營月

一試驗馬步中箭若干在監即聽祭酒司業月一試驗

策略并背誦武經等書各按季類報兵部覆聞 上從

之 六年春 命常寧大長公主孫沐琚入監讀書

九月都察院右副都御史張敷華奏准公侯駙馬伯子

孫年十五以上三十以上者送監照依監生讀書作課
講習禮儀每歲間月赴監比較文事一次間月以赴教
場操練武藝一次其侯伯駙馬亦令將兵家諸書及五
倫等書每季送祭酒司業處每日相兼授與二本各定
起止令在家誦讀免其作課季終拘驗如初必至三十
歲方免拘束雖公爵已襲在間官亦依此例時邊圉多
棘上方注意將材故云 嘉靖元年禮部舉故事具
題奉 旨公侯伯未經事任年三十歲以下都遵照
累朝舊典送國子監讀書着祭酒司業用心訓誨試驗

是歲公侯入監者凡八人 六年 月司禮監太監韋

霖傳奉 聖旨朕欲爲駙馬都尉謝詔選儒臣爲師讀
書習禮吏部便會禮部查照 先朝勲戚之家遇有訓
導教書事例於國子監博士助教等官凡在部及附近
教官內推選行止端莊年力英銳文學優長義理精明
的一員着在駙馬府教讀經書習字使其知忠孝仁義
之訓及通曉禮樂名物古今事類庶幾德器有成仍聽
禮部堂上官提調稽考教書官三年六年考滿若教有
成效不拘年分奏薦擢用本部會推助教金克厚及議

得本官原係進士出身比之先朝監生儒士止陞學錄者不同合無推陞部屬職銜聽堂上官提調專在駙馬謝詔府教習奉旨金克厚陞禮部儀制司主事職銜專在駙馬都尉謝詔府教習經書仍聽禮部堂上官提調稽考還照京官一例考滿陞用博士李欽吳監丞林介俱陞儀制司主事教駙馬讀書七年春命含山大長公主曾孫尹衡入監讀書九年禮部題公侯伯未任事送監者二十二人王田伯蔣榮奏免赴監不允仍行國子監務要通行稽考毋令怠惰十五年吏

部奏准公侯駙馬伯家教書訓導按月各將功課照例赴監考校九年到部行查時祭酒呂柟奏公侯伯子孫已未襲爵及未管事官舊規每日在監後偶從寬簡定以三八日期近年到監止二三人餘多不至蓋此輩惟耽驕惰不修禮讓一旦管事豈知練撫軍士乞勅該部轉行各爵戒飭子孫使之敬業樂學永保祿位有違例久曠者許臣等指名叅劾禮部覆奏行之十七年兵科趙士賢題公侯伯禮貌粗疎孺態猶存宜送監讀書習禮令祭酒擇監生有學識者爲友伴日誦兵書

問試策論以驗進否禮部題准入監如故事 十九年
五月禮部覆國子監司業兼司經局校書王同祖奏陳
四事一曰教世胄臣考之洪武五年令將官子弟承襲
幼者入監讀書成化等年節令公侯伯并駙馬初襲爵
者送監讀書習禮弘治正德間屢經舉行我 皇上龍
興致治崇化其於世胄之教亦既已行之矣但今世祿
之家間有一二入監習禮者又往往虛影故事不守訓
規其於齒胄之道恐莫能知况世臣祿位崇高驕奢易
長使不及其弱冠之年教之詩書禮義以敦其儒素之

風約之規矩準繩以移其傲慢之志則他日委任將見
膏粱紈袴之餘豈勝分闡干城之責鮮有不愆事者况
請自今公侯伯子弟年十八以上者該部具名上 請
送監讀書習禮本監仍每名選撥友伴監生二名與之
講學相資薰陶規勸每五日一赴監俟諸生立班定友
伴引至階下恭揖而退侍立兩傍以觀揖讓周旋之節
俟堂儀畢赴廂授書講習其有不率教者憑本監堂上
官奏 聞區處三年之後學有成效者本監奏 聞仍
加表異該部注記俟異時襲封之後有所委任據以甄

別賢否則庶乎彬彬向風知所警勸而國之大事亦有
賴等因查得嘉靖九年正月內該兵部題准爲申明舊
例預養年幼勲戚大臣事內稱公侯伯等爵除已推用
及年至三十歲已上外其餘未經任事三十歲以下及
應襲舍人年十四以上者通行查出送國子監祭酒司
業以大學語孟諸書相兼點授令其講讀又查得禮部
堂稿爲申明舊例預養年幼勲戚大臣事儀制司案呈
奉本部送准兵部咨該本部題武選司案呈查得成化
十一年六月二十二日該太監黃賜傳奉 聖旨西寧

侯宋愷寧晉伯劉福送國子監讀書今後公侯伯襲爵
并駙馬年二十五歲以下的都照例送監讀書又弘治
二年禮科給事中等官王繪等奏准要將在閒侯伯駙
馬分送各營隨同總兵官操練閒時督令習讀兵書周
知邊備方略每月一次總兵官聽其陳說觀其用心以
備錄用該本部擬議於五軍營將在閒侯伯駙馬另做
一隊聽提督大臣五日一次提督操練將兵家諸書并
五倫等書每季送國子監祭酒司業處每日相兼授與
兩本定與起止令其在家習讀季終赴監試驗有無通

續文獻通考 卷之五十五 二十六
曉大義其侯伯連舍人通算與駙馬俱至三十歲方不
拘束公爵已襲在閒者亦如此例又該兵科等科都給
事中楊瑛等于弘治九年奏准要將坐營侯伯擇師而
教該本部議得合無俱令常操時月若彼營歇操團營
該走營下操之日俱赴團營一同坐營官閱視畢俱赴
將臺聽提督官叩其韜畧試其弓馬而回托故不到者
亦聽叅究以後遇有閱實邊關或整飭邊備文職大臣
赴邊者奏差一員同去閱武他日任用大爲有益又正
德八年該本部議得公侯伯等爵生長膏粱承授祖蔭

年少既不讀書習禮年長又不操習武藝倘或一旦委
用未免束手無策合無本部通行五軍都督府通查帶
俸未任公侯伯除年未三十歲相應送監讀書者通行
查出開送本部轉送國子監祭酒司業處查照舊例舉
行奉 武宗聖旨帶俸公侯伯未及三十的都着送監
讀書每季依擬試驗又嘉靖元年該本部議得公侯伯
等爵官員先年各依父祖或翊運靖難之元勳或椒房
戚畹之族屬 朝廷推恩許令世襲有賢能者又獲世
官崇報之典極爲優渥但人生資稟既殊好尚不一况

此等世家之孫年幼之時若失於教養成立之後必鮮能繼承雖有祖宗之訓誥武臣之舊章累朝教育嗣胤之良法類皆廢閣不行難臻實效合將公侯伯等爵未經任事年三十歲以下者通行查出開送本部轉送國子監行祭酒司業將小學四書武經七書御製武臣大誥臣鑒五倫等書每日相兼點授今其在家講讀照依舊規量加損益每十日一次赴團營聽提督大臣督令操演每月終令各爵下教讀隨同赴監試驗有無通曉大義如有孝弟忠信禮義廉恥等行超卓實跡及

文義弓馬精否年終該營該監回報本部附寫簿籍以憑進呈御覽兼備參考推用不許推故安閒不行前去本部再行吏部備查各爵下見任教讀姓名履歷賢否先行考校以爲去留如遇名缺務選學問老成行止端莊者授以應得職分責令前去用心訓課并其應襲及子孫弟姪年幼俱聽教誨果有成效照例推用如有因循怠惰及縱令無籍荒淫異術邪佞之徒出入門下誘引非爲貽患各爵身家者該部查訪得實具奏黜退奉旨公侯伯未經任事三十歲以下的都遵照累

朝舊典送國子監讀書着祭酒司業用心教誨試驗還十日一次赴團營聽提督大臣督令操演其餘俱依擬行看得公侯駙馬伯係勲戚重臣兩京提督坐營坐府及在外總兵等官遇有員缺多於公侯伯數內推選守衛將軍亦例用年深老練駙馬管領須教之有素庶幾互相勸勉習與性成用之於內忠孝足任腹心用之於外材略堪充將領若徒有送監送操之虛名而無考校試驗之成法將見良心牴牾於外誘良能昏蔽於驕奢終身不可與入於善矣合候 命下之日申明前例通

行五軍都督府各將公侯伯等爵除已推用及年三十以上外其餘未經任事年三十歲以下及應襲舍人年十四以上者通行查出開送本部轉送國子監行祭酒司業將大學語孟諸書相兼點授令其在家講讀仍授以下學切要功夫以忠信篤敬培養本原心既篤實不僞聰明自然日進毋先之孫吳變詐之術以啓其奸僞好殺之心毋導之詞章浮艷之習以長其紛競爭勝之念至於射御之法軍師行伍之列皆他日之所有事然亦必學而後能每十日一次赴團營聽提督大臣督令

操演每月令各爵下教讀隨同赴監試驗年終該監該
營備將各爵舍勤惰進否緣由回報本部附寫簿籍以
憑參考推用俱至三十歲或有推用而止如有托故不
行前去亦聽叅究其各爵下教讀人員師道不立訓誨
無效以致各爵交結奸佞誘引爲非一體坐罪叅問退
黜見缺教讀者轉行吏部查處其駙馬都尉年三十以
下者應否亦照前例施行緣係申明舊例預教年幼勲
戚大臣事理未敢擅便嘉靖八年十二月二十二日太
子太保本部尚書李時等具題奉 旨通行遵照今國

子監司業王同祖奏要將公侯伯子弟具名上 請送
監讀書習禮及要甄別賢否各一節爲照勲臣之家前
代旣加褒錫後世子孫得以承襲爵祿或遇任使管理
軍務責任匪輕虞廷典樂之職胄子之教所由設也易
云蒙以養正書亦曰若生子罔不在厥初生皆言教立
之不可不密也况公侯伯應襲子弟出自膏梁素養富
貴易生驕惰苟非預教而善養之欲望其能不變於習
而成其德也難矣我 國家慎重典禮凡將官子弟年
幼者送監讀書自洪武至弘治年間節經舉行 皇上

登極益隆治化至嘉靖元等年又因該部建白申明前
例題 請凡公侯伯爵等無分已襲未襲已任已任年
三十以下十四以上通行查出送監讀書仍每十日赴
營觀操照例通行今本官奏要疏名 上請送監備諸
勸典無非修明禮教至意相應議處合候 命下本部
通行在京五京都督府及行南京兵部轉行南京五軍
都督府將見任公侯伯爵及應襲子弟年十四以上
三十以下未任者通行查出不許隱匿備具年甲籍貫
徑自開送禮部類具姓名上 請分送兩京國子監照

依嘉靖八年題准教法分撥習禮肄業本監堂上官躬
親督率轉行本堂教官擇老成有德器監生二名與之
朝夕講明道義習學典禮不許引誘爲非以後照例每
年二月查照一次舉行仍候教有成效該監開具行跡
送該部照例承襲祖父廕爵已襲未任者開送本部以
憑查考推用中間若有不率教者聽本監堂上官及監
丞等官照例糾過甚者奏 聞區處 二十年崇信伯
費煒等入監者二人 二十八年至三十年恭順侯吳
繼爵等次第入監者五人 三十一年入監已襲爵者

永康侯徐喬松廣寧伯劉允中未襲爵者定國公之子
徐文璧靖遠伯之子王學詩

勲戚歷年入監習讀姓氏

正統二年駙馬石璟 五年駙馬薛瑄 天順四年西

寧侯宋讓 五年豐潤伯曹振 七年彭城伯張瑾

成化十年保定侯梁博恭順侯吳鑑泰寧侯陳桓鎮遠

侯顧博駙馬都尉王增蔡震楊偉樊凱馬誠游泰靖遠

伯王添崇信伯費淮武進伯朱霖 十一年西寧侯宋

愷寧晉伯劉福 十二年陽武侯薛倫永順伯薛勲宗

人府儀賓王憲 弘治十五年晉寧伯劉岳 十七年

定國公徐光祚鎮遠侯顧仕隆彰武伯楊質東寧伯焦

淇遂安伯陳鏞 正德間文籍無考 嘉靖元年咸寧

侯仇鸞泰寧侯陳儒隆平侯張偉慶陽伯夏臣長寧伯

周大經平江伯陳圭東寧伯焦棟忻城伯趙武 九年

定國公徐延德已襲爵英國公張溶成國公朱希忠昌

國公張宗說未襲爵定西侯蔣傳已襲爵會昌侯孫應

乾西寧侯宋天驄武安侯鄭琨未襲爵駙馬都尉謝詔

寧晉伯劉文玉田伯蔣榮昌化伯邵杰已襲爵成山伯

王維熊宣城伯衛守正懷仁伯施燾彭城伯張勳建平
 伯高繼宗遂安伯陳惟忠安仁伯王燧武靖伯趙國斌
 南寧伯毛重器應城伯孫岱未襲爵 二十年崇信伯
 費煒應城伯孫永爵清平伯吳嘉彥襄城伯李應臣興
 安伯徐夢暘 二十八年恭順侯吳繼爵新寧伯譚功
 承 二十九年誠意伯劉世延成安伯郭應乾 三十
 年武定侯郭守乾 三十一年定國公徐文壁永康侯
 徐喬松靖遠伯王學詩廣寧伯劉允中
 太學出身事例

二祖篤建二雍紹隆周室 列聖光嗣丕贊前徽一代人
 賢之盛近古莫並焉太學諸生繁列四途曰貢曰舉曰
 廕曰例貢若師達許觀虞讓張本周新劉子輔吳寬舉
 若夏原吉楊鼎鼎陳諤陳綱姚夔商輅彭時王恕岳正張
 寧羅倫陳獻章何景明朱希周廕若張敷華例若羅玘
 或以行誼或以風節或以功業或以理學皆卓然特出
 著名當世不特拔巍科躋膺仕徧于中外已也
 國初太學生皆貢自郡邑選鄉學之秀彥者充之其後乃
 有各省鄉試舉人時進士之科未盛內而臺諫外而藩

臬率以授之太學生之成材者自科制既重太學生成材者與天下賢士盡入蒐羅於是內外要重之司皆歸進士而舉貢所稱監生者則有遺賢銓入高等不過授以省府幕僚郡佐州正而臺諫藩臬則必待其歷官有譽而後得之然亦千百而什一耳往年江陵張相當國嘗主力三途並用之議僅一行焉而輒不能繼豈太學之英能盡錄於科甲耶

太祖洪武二年擇國子生試用之巡行列郡舉其職者竣事復命即擢行省左右叅政各道按察司僉事及知

府等官 五年夏四月以國子生王鐸攝監察御史初上命祭酒司業選鐸等侍講 王宮至是試用之鐸

能其官擢浙江布政司左叅政六年九月纂修日曆選善書者謄寫國子生陳益暘等與焉 是年暫罷科舉令有司察舉賢才必以德行為本文藝次之仍令吏部選國子生之成材者與所舉俱叅用量材授主事給事中御史等官 七年擇博士趙倣等所教國子生年少聰明者李擴等入文華武英二堂說書謂之小秀才甚見寵遇明年以擴等爲監察御史 上以擴及郎敏等

在二堂學業日進宜職清要故擢用之 九年三月以武英堂紀事國子生黃義為湖廣行省叅政趙信為考功監丞 十九年五月 上以天下郡縣多吏弊民蠹皆由雜流得為牧民官乃 命祭酒司業擇監生千餘人送吏部除授知州知縣等職 二十年十二月擢監生李慶署都察院右僉都御史 二十四年選監生練達政體者得方文等六百三十九人 命行御史事稽覈天下百司案牘 二十五年擢監生師達墨麟等為監察御史夏原吉為戶部主事 二十九年擢監生盧

祥為刑部郎中 三十五年 成祖即位三月擢監生丁琰姚山李晟九月擢王孚陳禮朱肇何海陸禎王政姚烱阮瑤姚伯善俱為給事中

成祖永樂元年二月擢監生孔復楊鈍張文明李時秀蔣彥祿歐彥貴何器劉先為監察御史四月擢監生余得祥梁觀潘熙和為給事中張政原汪俊民趙能為監察御史五月 太祖高皇帝實錄成 賜騰寫監生梁逢吉等各銀十兩鈔三十錠六月擢騰寫監生鍾子勤陳彛訓劉謙沈文為中書舍人梁逢吉葉蕃沈紹先葉松

喬岳衛浩鄭中余從善陳俊良陳實爲監察御史七月
以監生汪必先鍾震劉觀就林金英張荔陳英楊泰劉
寔王文爲監察御史十月擢監生張恂十二月擢監生
郭宣畢進華楨王生沈旻張麟熊觀薛魯俱爲給事中
二年二月擢監生李矩周正秦瓚魏清文振許信閔
和呂衡楊祥楊儼任重王理陸必壽王良爲監察御史
四月擢監生楊銘游顏爲給事中 四年二月擢監生
彭進徐鑑方霖林道顧斌竇承芳朱福王輔彭鑑劉煥
黃員相七月擢監生宋仲祥周轅徐竒艾良俱爲監察

御史十月擢監生蔡誠彭昭尹醇鍾恕爲給事中 五
年九月擢監生李琳爲山東道監察御史 六年三月

擢監生回謙張冀四月擢監生孫儼王增朱應祖孫嵩
俱爲監察御史擢監生党忠爲吏部給事中宋載爲戶
科給事中胡渙王成美爲禮科給事中周鎬蕭鼎李頻
爲兵科給事中劉誠任憲爲刑科給事中劉泉胡進張
用中白永爲工科給事中 七年二月擢監生署六科
給事中汪藻吏科李節戶科劉伯蘊禮科金文英兵科
萬質刑科史壽工科擢監生劉子輔張觀鄭璘劉保陳

紀文獻通考
卷之五十五
三十一
耘張濬王琦張善王渥朱侃劉洵潘浩陳禮李本俱為
監察御史 八年署六科汪藻等俱實授擢監生許堪
蹇賢周珙金文斌駱大良許琪賈旭劉可范寧鄭季輝
蕭良張意汪泳劉政孫昇為監察御史郭良周順沈和
傅璇吳正陳鐸楊彝周岐陳諤周汝賢為給事中 九
年擢監生陳模李復鄭進善張添祿王景商賢胡寧劉
廣胡良誠于敏林勝宗白璧宋友謙為監察御史 是
年春進士鍾英張習張式馬信邵聰改翰林院庶吉士
初五人者由監生選入翰林習譯書至是登科故有此

改後以為例十年十六人十三年三十二人 十年三
月擢監生程玖為中書舍人隸翰林院書 制勅擢監

生張勤龍景亨趙文施悅濮恭任旺祝和陳恕郭端賈
節趙益廖睿周毅李善楊俊張斌吳文吳克聰顧立鄒
烜李弘蕭原祝昇苗貫謝庸熊傑童貞吳銘張達雷恭
解昌党衢周尚賓俱為監察御史十二月擢監生梁通
為河南按察使張岳趙彬為副使章錄李清為僉事二
月擢監生李華盧榮趙真趙旭卜楨楊益馮得為給事
中黃文惠王維新韓真李遜申嶽張肅封貴朱哲為監

察御史錢博葉泰姚秩金勉焦莊陳謨洪益中倪琮劉
維新王賓爲中書舍人冬十月擢監生王卣蘇弼楊和
李謙張志葛紹祖王憲許侃岳順梁盛張毅朱昭紀文
崔卣李濟王勵劉伸許能屈良張貫朱威陸德厚張縉
邵寔張守信苗友直李應康張翔馬駿牛麟田綱爲六
科給事中

宣宗宣德四年五月擢監生韓偉張玉爲監察御史

英宗正統二年以宣廟實錄成謄錄監生俱授中書舍

人

憲宗成化二年八月擢監生羅麟孫迪爲中書舍人侍

崇王讀書習字三年五月擢監生呂憲爲中書舍人

憲故學士原之子以廕補也是後官生命於中書舍

人習字出身以爲常八月命監生高垣入翰林習

字出身垣故工部尚書謹身殿大學士兼東閣大學士

崇王

崇王如外二年八月對遺上

